

醉侯詩鈔卷下

江甯劉源深少卿

送別月樵（戊子）

一年聚首無三月。百歲回頭已卅年。霜色漸愁侵兩鬢。風塵依舊聳雙肩。幾時同浪勞薪感。今日須拚買酒錢。不爲送君亦愁絕。杏花風裏雨絲天。

故人未別惟愁別。別後愁尤勝別時。一夫動須經歲月。臨歧忍吝送行詩。窮通慮豈惟衣食。貧賤交原重冷離。明日孤篷風雨夜。客窗心事只燈知。

寄銘青九江

千里關山繞夢寒。五年不見指輕彈。境仍故我情堪想。月比離人影易團。不遇翻知安命好。有家應信處貧難。何當湘水如衣帶。猶作淮流咫尺看。

北鄉道中

短策疲驢穩稱身。荒郊風景絕羣塵。成羣野樹工藏日。無主山花自媚春。問路喜逢沽酒客。聽泉雅合奏琴人。此行莫論緣何事。贏得詩成句亦新。

墨盒

飽飲金壺汁一觴。釀成多少大文章。蘊藏敢說經綸富。吐屬都含典籍光。渣滓全融形自潤。研磨已久氣俱香。漫言僅作文房玩。不竭才難斗石量。

日伴書廚與筆牀。絲綸未展且偕藏。撫衷能飲三升墨。下筆應騰萬丈光。無限功名從此出。幾經磨鍊肯輕忘。他年倘對天人策。仗爾淋漓奏玉堂。

臥觀雲勢戲作

臥游爭道少文閒。我臥觀雲趣更閒。天作翠屏風代畫。層層皺出桂林山。

詠古小章

伍員簫

一片商聲滿市秋。古今難說是窮愁。知音落落誰開眼。恩怨茫茫未出頭。寸管應斑無限淚。丈夫須報不平讎。至今空剩胥江水。夜夜潮猶作怒流。

張良椎

博浪沙頭駐袞袍。轟然一擊鬼神號。突於項羽當筵劍。險過荆卿繞柱刀。天不亡秦車竟誤。公能無恙策尤高。饒他十日窮搜去。銷鐵當年已枉勞。

周郎橋

奕代勛名尚未消。路人猶說姓周橋。論才不敵惟諸葛。豔福何脩得小喬。一戰險擒天下賊。千秋難冷大江潮。東風此後如方便。燕向瀛檀艦艦燒。凭欄何處弔英雄。空贍長橋臥彩虹。腹內有兵爭漢鼎。眼中無地著曹公。轟轟夜走燒軍火。繞繞東來得意風。贏得千秋傳戰蹟。漁歌猶唱滿江紅。

謝公墩

一拳突起峙江城。鳥語都含綠竹聲。局外當年誰破敵。樽前今尚怕彈爭。離山草豈無高志。出岫雲終有遁情。我亦同民憂樂客。幾時來結遂初盟。千載鴻泥尚有痕。風流當日更無論。座中綠竹消人意。棋裏干戈斷賊魂。大隱跡原雜朝市。偏安名已滿乾坤。卻憐寥落西江客。罷相歸來苦占墩。

溫太真築壘處

四望山頭弔太真。蒼蒼遺壘燦然陳。衰時最見忠良力。快事親誅跋扈臣。威望至今留草木。勛名終古亘星辰。如何天竟甘亡晉。不爲蒼生壽此人。

雷次宗講學處

鷄籠高塚仰遺塵。想見巾幘侍講臣。清操獨能標濁世。瓣香我欲奉斯人。半生芳躅追陶令。後起虛名笑彥倫。遙想廬山終隱處。風微十載定如新。

梁昭明讀書處

岩傳太子溯淵源。不愧昭明讀號尊。兩漢文章資筆削。六朝金粉獨台存。惜無永壽延梁祚。空有遺書慰夜魂。七佛菴邊風瑟瑟。至今人說舊王孫。

陶通明幽棲處

三峯環峙翠巒聯。萬壑星攢靄碧烟。自昔山中來宰相。至今父老詔神仙。試尋丹竈搜奇蹟。不愧紅塵小洞天。瓦井欄邊讀遺碣。摩挲苔篆夕陽偏。

項羽鉅鹿之戰

氣欲吞秦虜。頭先墮冠軍。呼聲動天地。叱咤暗風雲。壁上觀猶怯。囊中信罕羣。如何垓下戰。不奏棘原勛。

光武昆陽之戰

天未衰炎漢。昆陽殺氣生。雷霆昭聖武。風雨助威聲。帝豈能容假。師真出有名。中興如破竹。一戰已分明。

周瑜赤壁之戰

一炬全軍墨。三江澈底紅。火攻奇在水。快事好東風。獨斷吳廷策。誰知蜀相功。笑他張子布。羞說白

頭翁。

苻堅淝水之戰

淝水愁雲黯。苻秦禍自縻。兒曹能破敵。草木亦疑兵。投策終何用。寒流尚有聲。卻憐王景略。得主亦虛生。

新脩十廟題詠

十廟者雞鳴埭下舊有廟十明所建也兵後蕩然戊子春方伯許公以旬宣之暇於舊廟所祀刪其不經增其未備自晉迄明凡九公合以會文正爲十賢鳩工庀材同堂共祀皆有名德於金陵者也落成仍其名曰十廟徵題詠焉爰各爲一詩以代贊

王文獻公導

艱危家國兩難圖。跋扈臣多相力孤。赤族禍幾殃叔向。青年望已負夷吾。無聊不下新亭淚。可奈空權幕府符。今日春祠薦蘋藻。河山風景喜無殊。

陶桓公侃

惜到分陰志豈荒。此身誰謂慣勤王。舉朝只解遵時賊。卓識偏能關老莊。折翼安騰無證謗。撫衷誰見不臣腸。千秋毅魄猶含痛。青史應刪字數行。

溫忠武公嶠

慷慨宣勤死不辭。誤人誰使限雷池。屈身儘可安權幕。列鎮皆知畏義旗。行酒智偏工避譖。絕裾心合恕微疵。獨憐星殞旄頭速。不見中原破賊時。

卞忠貞公壺

甘居鄙吝卻浮塵。兩晉如公有幾人。眼陋中朝名士習。身爲臨難死綏臣。一門各盡綱常分。千古無慚正

直神。翹首冶山松柏暗。荒祠野鳥自啼春。

謝文靖公 安

氣度沈閑逸韻飄。風流宰相冠南朝。一身早繫蒼生望。片語全消逆節驕。兒輩能兵原可喜。使君老淚太無聊。東山絲竹今誰屬。芳草無言綠過橋。

曹武惠王 彬

提戈操印果然真。難得才兼智勇仁。三代下無如此將。大江南盡受恩人。何須半部誇論語。自有千秋壓相臣。我向祠前三下拜。旂常不愧萬年新。

韓忠武王 世忠

騎驢一去韻如仙。三字前車勸着鞭。絕口不談軍國事。傷心無望太平年。西湖風月聊爲主。南渡江山付與天。飲恨至今仗誰說。濤聲猶似鼓淵淵。

徐武寧王 達

平地風雲際虎龍。天教草昧起英雄。身經百戰無驕色。識妙諸臣保令終。佐命開基周尚父。敦詩說禮晉元戎。朱門草沒尋常事。百世坊猶鑲大功。

常忠武王 遇春

莽莽河山列戰枰。將軍自是一時英。縱橫安用三千字。部署能提十萬兵。不敗從知真福將。善攻何地有堅城。漫云未是奇男子。婦豎猶能說大名。

曾文正公 國藩

奮武揆文赫壯猷。中興將相兩無儔。孤軍轉戰三千里。一劍功收百二州。憂樂同民范文正。寬嚴交濟武鄉侯。南都況是棠陰地。沒世馨香未足酬。

十字碑

延陵祠下訪殘碑。十字寥寥勝誅詞。先德無慚周泰伯。大書難得魯宣尼。褒題直創麟經例。贊嘆全包馬史辭。閒倚斜陽一憑弔。西風高樹滿秋思。

三高祠

茫茫名利黯紅塵。幾輩知抽宦海身。卻喜才皆儕漢傑。居然智總勝殷仁。千秋烟水餘芳躅。一例江湖作散人。今日同堂應共笑。秋風莫憶憶吳莚。

投金灘

千金揮手擲何輕。感此窮途一飯情。巾幘行藏何磊落。英雄恩怨要分明。已開漂母憐才例。直使錢奴愧汗生。不信風塵回首看。鬚眉有幾及傾城。

試劍石

巉岩怪石嶄然開。道是干將試劍來。劈破巨靈天外掌。劃分華嶽地中胎。漫將飲羽誇神勇。直似并刀快剪裁。我亦及鋒思試客。幾時展此化龍材。

桃葉渡

桃根桃葉意如何。渡口今猶唱囉歌。夾岸烟花前日夢。六朝風月此溪多。偶然名士留住話。亘古香塵說永和。贏得詞人誇豔蹟。年年簫鼓泛情波。

梅花嶺

閣部孤忠日月光。山藏毅魄土都香。有公臣豈皆亡國。不幸君偏遇福王。繼踵武侯眞盡瘁。前身文相不荒唐。清祠合在梅花下。歲歲冰霜鍊節芳。

陶貞白祠

湖光岫影綠浮煙。何必茅山小洞天。滿地松花塵不到。此中原合住神仙。

望湘樓卽目

放眼天無際。湖光冷浸星。倒涵千嶂綠。飽吸一窗青。雨過荷傾蓋。風來水送聲。凭欄思往事。一鷺下烟汀。

大鐘歌

大明天子天生雄。才掃六合乘六龍。忽思霜鐘掌禁漏。崩然斫盡銅山銅。風伯扇火日炙炭。陰陽聚煉成洪鐘。大聲隆隆發水上。穿雲裂石聞蒼穹。恐驚上帝不敢叩。頽然廢置塵埃中。臥闕興亡五百載。無聲無臭如瘖聾。一朝拂拭出泥土。寶氣騰采光熊熊。萬口喧奇走相視。肩摩足跂人如蟲。大鑄洪武廿一載。月建在戌臣部工。口徑六尺厚十寸。圍約丈許深相同。陸離斑駁土花錯。魚雅彷彿彝壘容。半身湮汨已易代。邇乃懸紉離荆叢。我聞神物不世出。顯晦有數人無功。周鼎避秦乃入洛。延津劍化精如虹。石鼓駝致貢太學。詞臣頌瑞歌車攻。方今天子甚隆聖。春秋已富天亶聰。如日初出十四載。明年親政朝羣公。此鐘忽然出塵壙。毋乃應瑞調鈞鴻。上陪鎬京振賁鼓。和聲鳴盛鏘笙鏞。下協四海震服兆。暢汭聖澤宣皇風。其間必有名世出。仰佐文治昌辟雍。方其磅礴大鼓鑄。造化鎔煅神磨礱。豈期非時莫能用。歷祀五百年顯通。允宜典重視彝鼎。萬夫鑿致登難籠。飛亭鐵柱相覆紉。曉夜撞擊開羣蒙。佇看聲暗盡醒發。寰宇熙皞歌和豐。

三十初度

回頭瞥電十年過。奈此勞人草草何。小杜風情餘夢在。大蘇經濟入詩多。雖無媚骨迎富路。終有雄心躍太阿。起舞拚如劉越石。擎天壯志不蹉跎。

榜下作

槐黃三度踏秋塵。又是西風掃穢人。失意固難遮俗眼。賞心忍再負良辰。文章豈遂無知己。窮達由來有鬼神。酒熟蟹肥香滿菊。放懷且醉甕頭春。

登鐘山絕頂偕丁佩秋志蘭作

高會凌絕頂。卓然豁倦眸。罡風吹酒醒。秋色盈神州。天語疑可接。江河如帶流。羣峯矗南北。俯視皆培塿。始知人眼界。未可一例求。嘆我鬱塵壘。卑瑣同雞猴。臨風一盻目。時事方殷憂。位置欲何等。蒼茫生古愁。

郊望（己丑）

芳原延秀色。畫意擬荆關。晴翠迷前浦。虛青混遠山。翼憐飛鳥倦。夢美睡鷗閒。徙倚思無盡。名心淡欲刪。

覆銘青

年來頗覺展眉頭。約略爲君說浪游。坐月不嫌無伴飲。看花到處有詩留。勞勞形喜猴非楚。栩栩神疑蝶化周。兩字功名清貴極。酒泉老守醉鄉侯。

別院漫賦

繡簾籠夢篆香清。軟軟東風放午晴。滿地落紅人睡起。綠楊枝上一聲鶯。

花月痕題詞

一珠一字淚穿成。多少才人痛哭聲。補恨豈真天有路。埋香偏是地多情。少陵心事空千古。小杜風懷誤一生。我亦不知爲誰感。開編處處涕縱橫。
萍因絮果幻耶真。萬古難銷此劫塵。鵲石空填碧海。鶯花何苦媚青春。事關聚散原須福。才到清高總誤身。未免有情誰遣此。悽儂況是箇中人。

苦縛蠶絲識恨紗。無聊誰使戀風華。人生可感惟知己。世路難行勝狹斜。萬里烽烟昏劍戟。一江秋月咽琵琶。那堪回首英雄老。青眼徒逢薄命花。

漫道花痕與月痕。眞花眞月又誰存。鏡中緣本傳虛影。海外香誰見返魂。仙佛可成惟血性。人天不朽只情根。傷心留得千秋語。羞向紅顏說報恩。

有感續題二律

軼代才華豔世姿。古今幾輩肯趨時。不生媚骨應同哭。別有傷心各自知。局裏錯誰分黑白。人間畫本重胭脂。漫嫌曲曲彈哀怨。自古青衫與淚宜。

年來潑鬢感星星。孤負樽前柳眼青。忍看鴛鴦通目語。好憑鸚鵡識心經。飄零淮海人何處。惆悵揚州夢久醒。盃酒借澆誰解得。花前說與杜鵑聽。

秦淮卽事示野橋岫東月樵

一舸隨流遣興來。清談時受管絃催。輕盃激灑情波滿。搏陣喧闐酒意頽。燈下睡棠羞不覺。風中狂絮浪難猜。劉郎已被天台誤。無限名花眼倦開。

望月吟

銅壺漏急人未眠。空庭夜白花浮煙。微風不動竹有影。明月照人清可憐。長空澄碧片雲淨。萬里一樣當頭圓。遙知天下有情目。與我同注冰輪邊。素心共此一盤照。如何人隔天涯天。凌風安得生羽翼。含笑相見丹霄巔。徘徊欲睡不忍睡。蟋蟀伴我吟階前。

偶至駐馬坡二首

逶迤沿城曲。無心登古原。言尋翠微寺。遂入蓋山園。竹裏鳥相語。花中蜂自喧。蕭然孤倚檻。嵐氣濕疎軒。

小憩得幽境。流連意轉愁。塵勞驅我俗。清福妬僧修。琴韻松陰潤。茶烟竹徑浮。那知名利客。熱夢苦難休。

湖南劉非石瑩爲膝篋者所窘旅泊金陵與之談恂恂然文雅士也爲釀貲贖之歸賦此以送

萍水無心遇。風塵兩瘦生。憐君才不俗。自古路難行。曉月催鄉夢。浮雲幻世情。林泉如可樂。莫作出山聲。

別意知何限。長亭又短亭。一篙淮水綠。千里楚山青。時事何堪說。鄉音漸喜聽。他年好相見。只恐鬢星星。

唐友蘭芝筭請題其尊人荆門先生小照

耕讀怡情數十年。莊襟老帶最翛然。文難入俗才方貴。人到能閒福卽仙。圖史百城名士業。桑麻十畝太初天。漫言不是瀛洲侶。已讓佳兒着祖鞭。

有田有硯守煙村。蝸角蠅頭總莫論。老子自饒泉石興。王侯那及布衣尊。閒中歲月忘今古。世上科名付子孫。他日樞衣瞻道範。臥龍下拜德公門。

小軒偶書

短几凭窗坐。圖書左右環。山情生畫裏。濤韻瀉松間。人與秋爭瘦。心因懶覺閒。不緣賒酒出。鎮日杜柴關。

盆蘭

煙苗雨葉暗香籠。氣味清憐爾我同。不是朱門無地種。懶陪桃李媚東風。

過薛廬偶作

水環亭子柳環隄。隄上風來萬縷低。此去紅塵知幾里。綠煙遮斷路東西。

茸茸細草軟如鋪。緩步歸來日未晡。添起爐香無個事。一簾花雨夢西湖。

登金陵城四望懷古用王荊公和王微之登高齋三首原韻。

古憂萬斛無地埋。牢騷蟠腹誰能捄。登高試豁雙倦眼。案牘攢簇肩相挨。眠峨走幹一氣下。刀斫不斷青鬼鬼。環城插笏森拱衛。蒼然布陣礙空堆。長江爲塹眼南北。此水眞劈銀河來。金陵古說鬱王氣。當較今日尤雄哉。滄桑塵劫何屢換。有酒當飲三百杯。振衣一嘯發狂論。放眼我欲吞八垓。古今運會雖有定。開屯畢竟資雲雷。天時地利豈足恃。成敗終仗人安排。智者防患察未起。愚者觀象迷星台。存亡倘盡譏氣數。治化何必資賢開。君不見龍蟠虎踞更幾代。當日何地非樓台。匆匆一例短如夢。若咎天運天應哈。昏亡接踵不知鑒。此恨堆若沙填淮。

天風浩浩吹黃埃。六朝宮闕安在哉。萋萋煙草渺無盡。叫月空剩寒螿來。回憶當時苦創造。志封秦岱吞江淮。龍爭虎鬥力征繕。割據禪代紛相挨。翻雲覆雨等兒戲。幻如傀儡登歌臺。肆出詐力攘神器。那復顧忌人冒哈。豈知生子多不肖。北邙難保青堆。但識無愁作天子。遂令狎客升鈞台。舞衣歌扇恣歡譁。哀絲豪竹喧春雷。長星汝何太多事。有酒且飲葡萄杯。金土擲。珠泥筵。惟然聲色難兼該。吁嗟乎一旦烽傳孰汝守。青山不語空崔嵬。至今江邊開鐵鎖。尙有斷絙枯巖排。在德在險向誰說。菜花黃上臺城開。

金川不守龍火埋。孝陵佳氣空鬱鬼。自古知子莫若父。此誤當罰千百杯。可憐萬世鑄疑案。天下大師徒銘堆。從臣野老苦泣血。至今草木猶含哀。後來小腆分閭位。朽木豈足當驚雷。大局已失滿盤子。一隅乃欲支揚淮。荒孰况復邁六代。晝夜夢上高陽臺。駑馬遂欲任千里。賢才有幾容淘穢。長江宋已失天險。矧使鎖鑰重重開。坐令孤忠流碧血。椎心無路號三台。春燈燕子歌絕調。輔臣才藝真奇哉。選聲徵鼓費調羹。他事豈尙勞安排。焉知此樂席未煖。天戈揮雪橫江來。噫吁嘻螳臂撐輪本不量。神器已定安能

回。燕怡危幕魚戲釜。此輩胡爲生絃絃。紫色蛙聲那足惜。昏庸一轍殊可咭。臨風試溯往來事。銖兩末路何相挨。山川無言自青綠。令我三嘆興基才。

山寺野眺

古刹隱山坳。徑曲脩篁夾。嵐氣霏濕煙。澗聲響空峽。林鳥靜相忘。澤麋馴可狎。日落僧樵歸。一肩紅葉壓。

看放紙鳶（庚寅）

平地翻身竟上天。暗中線索要牢牽。罡風吹斷歸無路。莫到青雲便放顛。

書邯鄲借枕圖後

四十年來夢似眞。盧生去後已千春。不知此枕長多少。尙有紛紛未醒人。

青谿閒步

青谿橋畔踏青來。花隱重簾柳拂臺。偏是夭桃春意甚。幾枝含笑倚門開。

到處

絮語萍緣莫笑癡。狂吟浪飲趁閒時。前身合是劉評事。到處看花總有詩。

送許仙屏方伯入覲

介圭修觀典遵虞。一路春風上帝都。臣有嘉謨期入告。君方向學定崇儒。香沾御案雲籠袖。袍拂官花露滴珠。多少閭閻艱苦事。佇看敷奏一時蘇。

自從仙吏降蓬萊。激濁揚清妙化裁。愛士每聞勞吐握。良材無不受栽培。夷吾豈獨江東賴。管子原爲天下才。指日領圻持節出。方方爭望使君來。

游山戲作

峯青澗綠樹煙環。酒盡詩飄伴往還。我本天台仙子侶。桃花時節慣游山。
一林幽鳥語關關。流水無言遞翠鬟。祇恐紅塵人到此。轉憐山色太清閒。

暮春訪舊書感

寂寂金堂落畫塵。呢喃舊燕枉生嗔。一簾花雨香沈影。滿地槐雲綠過春。寫照自憐空賦色。工愁不合作詩人。良時畢竟緣誰負。獨倚斜陽一點神。

樓頭柳色尚依依。可奈東風捲絮飛。已作浮萍隨逝水。更誰金縷試歌衣。流鶯葉底羞相見。杜宇枝頭苦喚歸。一覺紅窗遲好夢。天涯冉冉綠陰肥。

歌裙舞扇境疑仙。舊路重來隔幾年。花事都成蝴蝶夢。竹枝許唱鷓鴣天。鴨爐香久灰心字。鸞鏡光空照面圓。只有簾前鸚鵡好。相逢依舊語纏綿。

叩闌何人識舊腔。猶兒樹底吠聲鳴。碧桃已嫁花餘幾。紅豆多情子結雙。春色真成婪尾酒。月痕猶在畫眉窗。紅牋疊破憑誰寄。昨夜賓鴻已渡江。

中秋夜喜銘青忽自九江至

開門一見喜驚連。何地飛來縮地仙。六載不逢千里客。今宵同對十分圓。升沈幾輩都非昔。慚愧狂奴尚似前。如水月華如夢事。君歌我飲且陶然。

送吳潤之赴粵卽步其留別韻 有引

霜林葉脫。洞庭始波。露砌蟲吟。關河乍冷。當游子將行之候。適愁人正瘦之時。固別緒之同縈。何懽懷之可索。然而生懸弧矢。志原期以四方。聘待弓旌。程尚卜乎萬里。矧嶺嶠是華夷門戶。凡島洋皆中外關鍵。宏闊歷當趁昇平。擴見聞卽增經濟。弔趙佗於古粵。好搜象郡之奇。作王粲之依劉。勝守兔園之冊。莫因遠客。遽淒淒歌行路難。倘作勞臣。且僕僕爲蒼生出。

壯先生行色。請浮此菊釀三樽。逢驛使歸來。好奇我梅花一樹。

驪歌三疊唱何酸。此去須知眼界寬。籌海正需游五嶺。易居何況勝長安。丈夫到處爲家好。聖世休歌行路難。且趁昇平探阮塞。飽看山水緩雕鞍。

浪游萬里漫心酸。客裏胸襟要自寬。鍊我才華須涉世。禦人志節是貪安。文章氣得江山壯。飽暖謀非爾我難。更盡一觴揮手去。莫拋離淚洒征鞍。

送銘青

不見六七年。忽來四五日。寸心無限懷。猝言言不出。西風獵獵鳴。悠悠吹行旆。車脂轄。馬結纓。僕夫來告君又行。行者不可住。住者若爲情。月中今夜愁聽雁。雲外聲聲唱渭城。

譙席戲作

畫簷花簇肉圍屏。宴敞瑤池會列星。仙醞濃斟香乳白。遠山遙妬秀眉青。殷勤鳳瑟樽前勸。婉轉鶯心曲裏聽。四座無言誰獨飲。醉侯今夜比人醒。

晚秋雜述

淒淒風雨黯江城。秋盡涼催氣候更。籬菊凋黃猶兀傲。盆松蟠翠自縱橫。門無客可知閒況。室有兒常聽讀聲。貧富不妨都膜置。此生未必竟虛生。

天時朝暮異寒溫。世態炎涼更莫論。他日功名難預料。如虹豪氣喜常存。西成望硯豐原少。南面擁書我亦尊。親友罕來酬應減。蕭蕭紅葉自敲門。

霜飈作勢怒呼號。萬物淒迷改舊操。荒院綠餘苔點綴。凌霄青剩竹孤高。聽談時事思投筆。醉唱離騷當舞刀。我縱無聊猶可遣。不堪情是雁嗷嗷。

搔首何須妄問天。讀書遲已悔當年。風塵事事違心曲。霜色駸駸上鬢邊。才不如人窮是分。貧而能樂命

何權。祇愁有日登雲路。空把詩文換俸錢。

濃陰漠漠黯無涯。禾稼連雲有幾家。室可容身聊偃仰。市多游手覺繁華。學難濟世書空讀。文懶趨時計自差。我不笑人人笑我。謀身都拙尙誰嗟。

嚴霜又迫歲寒朝。老圃秋容漸次凋。萬里邊聲傳鐵馬。一天寒色壓盤鵠。迷迷城草隨風靡。點點江蘆作雪飄。聞說榆關新調戍。幾人功似霍嫖姚。

夜酌有感懷月樵

簷前銅鑼響參差。城上悲笳雜馬嘶。風雨無人孤酌夜。江湖有客憶家時。書難常達思空切。世正需才學悔遲。安得桃源偕隱去。困來夢亦到軒羲。

大風渡江（辛卯）

一舸乘流下。長江滾滾東。天因誰設險。風到此真雄。帆側舟欹水。濤驚浪過篷。輸他釣船叟。一笑早收筒。

二月十五夜抵揚州

星星燈火鈔關頭。何處簫聲起畫樓。難得好風相送我。月剛圓夜到揚州。

晚宴後示友人

會向青樓醉錦屏。慣燒紅燭說風情。而今懶做風流夢。獨上虹橋玩月明。

登平山堂

六一銷沈跡蹟荒。我來凭檻感蒼茫。隔江山色橫帆外。繞徑松聲落座旁。煙柳無窮剛上巳。風流何處覓漁洋。酒懷不勇詩懷減。負此鴻泥跡一場。

乘小舟渡至小金山

菱舟一葉渡湖灘。淺綠灣灣直到欄。拂檻修篁添水意。環庭怪石當山看。蕪煙十里青無際。花氣一簾春未殘。徙倚虛堂忘日暮。夕陽紅染塔尖丹。

露筋夜泊

繫纜荒祠燈火殘。舵樓縱目水天寬。不知何處漁歌起。三十六陂煙月寒。

早過高郵卽目

曉霧初收堞影迷。綠煙繞郭草萋萋。沿堤少婦如花貌。楊柳陰中賣荸薺。湖煙一白拍天遙。沙鳥風帆隱現飄。我倚船窗無箇事。滿胸畫意付詩描。

晚過淮陰釣臺

舟近淮城日將暮。歸鴉也與帆爭渡。榜人指點淺蘆灘。道是韓侯垂釣處。幾家煙柳自成村。一帶茅籬半倚樹。功高險更甚風波。何似老漁溪上住。賣魚換酒樂朝朝。醉閱春秋不知數。

泊清浦有憶

曾說家臨淮水斜。門前一樹碧桃花。鴛鴦水畔閒親繡。鸚鵡簾邊解喚茶。何日雕梁移舊壘。依然咫尺恨天涯。回頭二十年前夢。空憶孤篷望月華。

宿遷阻風舟人強行半日不及十里力盡可嘆因命回船仍泊舊處買酒勞之爲作此詩

朝曦初上宿關口。鳴鉦鏜鏜解纜走。大風挾怒自北來。船若倒推水苦陡。中流溜急舟突橫。掀篷振窗烈於吼。艙中飛入迷眼沙。岸傍拜倒垂腰柳。前呼後叫爭推移。力挽千鈞非一手。進尺退丈如登天。十里未終時及酉。篙師力盡艙貼胸。縛夫背曲泥及首。吁嗟此輩誰非人。沒踝穿脛爲升斗。我無王事何皇皇。忍勤夫役敝鍾肘。不如轉舵飽張帆。回泊前宵舊沙阜。買魚煮稻同飽餐。勞爾一樽黃橘酒。由來逆境難強爭。風有順時且暫守。

銅山官舍題壁

一茶一酒總民脂。何德何功忍受之。好趁片帆歸去也。江南筍嫩鱖肥時。

歸過揚州再至平山堂

記得登臨逢上巳。再來榴火艷端陽。滿湖水點荷錢碧。平野風推麥浪黃。試聽笙歌凭畫舫。重尋墨跡上山堂。誰知前度看花客。走馬風塵又一場。

東溝田上作

穫禾喜新畢。漉酒相勤勞。招我坐稻場。促膝斟松醪。既烹籬下雌。又得江中蟹。紛起呼盡觴。置罍勿牢騷。讀書信何益。不如耕東臬。雞瓮資餘糧。蠶帛可自織。飲啄不恃人。勢利無能撓。山水名高深。樵釣恣吾曹。手足雖胼胝。心腹無煎熬。強如車馬喧。平地多風濤。近聞富貴場。功名資錢刀。朝呈黃金橐。夕着紫羅袍。既無登雲質。安能翔風翺。折腰況不甘。何若歸田韜。誰言陶淵明。乞米非賢豪。智者當因時。毋爲首頻搔。感此連舉觴。不覺醉醺醺。仰看豆棚上。鸞鸞眉月高。

隴上曉望

侵晨步登隴。淡月明前溪。閑閑蛙息喧。喔喔雞一啼。露華濕草心。氣潤寒不凄。山容斂霧開。江白浮天齊。羣動寂未生。一念純天倪。佳哉平旦時。澹定超塵蹊。忽聞叱犢聲。紅日東方躋。負手尋徑返。觀榮臨寒畦。

冬渡

水落江身瘦。風定波心平。釣艇將南游。我亦乘之行。扁然如鴨浮。一葉凌空明。不覺北岸遠。但見南岸迎。泛泛意殊適。飄飄仙比輕。何不五湖去。煙波無限情。

雨夜廣陵舟中（壬辰）